

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савет

R J E Š E N J E

**po Prijavi namjere koncentracije privrednog subjekta Home Art&Sales Services AG,
Švicarska Konfederacija i privrednog subjekta Centrotexil d.d. Republika Srbija**

**Sarajevo
juni 2007. godine**



Broj: 01-01-26-012-9-II/07
Sarajevo, 21. juna 2007. godine

Na osnovu člana 25. stav (1) tačka e), člana 42. stav (1) tačka d) i člana 43. stav (2), a u vezi s čl. 12., 14., 16., 17. i 18. Zakona o konkurenciji («Službeni glasnik BiH», broj 48/05), a po Prijavi namjere koncentracije preuzimanja privrednog subjekta Centrotekstil a.d., Kneza Mihailova 1-3 11000 Beograd, Republika Srbija, od privrednog subjekta Home Art & Sales Services AG, Shileggstrasse 23, CH-8823 Wollerau, Švicarska Konfederacija, podnesenoj od Zajedničke advokatske kancelarije Bojana Tkalčić-Đulić, Olodar Prebanić i Adela Draganović, Alipašina 51, 71000 Sarajevo, zaprimljenoj dana 19. aprila 2007. godine broj: 01-01-26-012-II/07, Konkurencijsko vijeće na 47. (četrdesetsedmoj) sjednici održanoj dana 21. juna 2007. godine, je donijelo

R J E Š E N J E

1. Ocjenjuje se dopuštenom koncentracija na tržištu prodaje na veliko i malo odjećom i obućom u Bosni i Hercegovini koja nastaje sticanjem kontrole u privrednom subjektu Centrotekstil a.d. Kneza Mihailova 1-3, 11000 Beograd, Republika Srbija, od privrednog subjekta Home Art & Sales Services AG, Shileggstrasse 23, CH-8823 Wollerau, Švicarska Konfederacija.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je zaprimilo Prijavu namjere koncentracije (u daljnjem tekstu: Prijava) sticanjem kontrole u privrednom subjektu Centrotexstil a.d., Knez Mihailova 1-3, 11000 Beograd, Republika Srbija (u daljnjem tekstu: Centrotexstil) od privrednog subjekta Home Art & Sales Services AG, Shileggstrasse 23, CH-8823 Wollerau, Švicarska Konfederacija, podnesenoj od Zajedničke advokatske kancelarije Bojana Tkalčić-Đulić, Olodar Prebanić i Adela Draganović, Alipašina 51, 71000 Sarajevo (u daljnjem tekstu: Podnosilac Prijave ili Home Art) zaprimljenoj dana 19. aprila 2007. godine broj: 01-01-26-012-II/07.

Uvidom u dostavljenu Prijavu, Konkurencijsko vijeće je utvrdilo da ista nije potpuna, u smislu člana 30. Zakona o konkurenciji (u daljnjem tekstu: Zakon), te je u skladu s članom 31. Zakona zatražilo dopunu, dana 26. aprila 2007. godine broj 01-01-26-012-1-II/07; dana 04. maja 2007. godine broj: 01-01-26-012-3-II/07 i dana 23. maja 2007. godine broj: 01-01-26-012-5-II/07. Podnosilac Prijave je u skladu sa zahtjevom Konkurencijskog vijeća dopunio Prijavu nedostajućom dokumentacijom, dana 04. maja 2007. godine broj: 01-01-26-012-2-II/07; dana 18. maja 2007. godine broj: 01-01-26-012-4-II/07 i dana 31. maja 2007. godine broj: 01-01-26-012-6-II/07.

Po prijemu tražene dokumentacije Konkurencijsko vijeće je utvrdilo da je Prijava kompletna i izdalo Potvrdu o prijemu kompletne i uredne Prijave, u skladu sa članom 30. stav (3) Zakona, dana 11. juna 2007. godine broj: 01-01-26-012-7-II/07.

Konkurencijsko vijeće u postupku ocjene predmetne koncentracije je utvrdilo sljedeće činjenice:

Podnosilac Prijave je u roku podnio Prijavu, u smislu člana 16. stav (1) Zakona, u vremenskom roku od 8 (osam) dana od dana zaključenja Ugovora o kupoprodaji privrednih subjekta sudionika koncentracije.

Podnosilac Prijave je naveo u Prijavi, u smislu člana 30. stav (2) Zakona, da je podnio zahtjev za ocjenu koncentracije Komisiji za zaštitu konkurencije Republike Srbije, dana 18. aprila 2007. godine.

Sudionici koncentracije

Sudionici koncentracije su privredni subjekt Home Art & Sales Services AG, Shileggstrasse 23, CH-8823 Wollerau, Švicarska Konfederacija, i privredni subjekt Centrotextil a.d Knez Mihajlova br. 1-3, 11000 Beograd, Republika Srbija.

U predmetnoj transakciji Agencija za privatizaciju Republike Srbije, Terazije broj 23, 11000 Beograd, Republika Srbija, je pravno lice osnovana Zakonom o privatizaciji («Službeni glasnik Republike Srbije», br. 38/01, 18/03, 45/05) i Zakonom o Agenciji za privatizaciju («Službeni glasnik Republike Srbije», br. 38/01 i 135/05), nadležna je za prodaju društvenog kapitala u privrednom subjektu Centrotextil.

Privredni subjekt Home Art

Privredni subjekt Home Art je osnovan i djeluje u skladu sa propisima Švicarske Konfederacije, upisan je u Trgovački registar kantona Schwyz pod brojem: CH-170.3.016.785-8, dana 01. marta 2001. godine.

Osnovne djelatnosti privrednog subjekta Home Art je trgovina, posebno proizvodima robnog znaka Zepter (modni nakit, satovi, kozmetika i slično), za privredne subjekte unutar Zepter-koncerna.

Privredni subjekt Home Art u 100,0% je vlasništvu privrednog subjekta UBA United Business Activities Holding AG, Sihleggstrasse 23, CH-8832 Wollerau, Švicarska Konfederacija (u daljnjem tekstu: UBA United Business), upisan u trgovački registar kantona Schwyz, pod brojem: CH-170.3.016.516-9.

Također, privredni subjekt UBA United Business (..)**¹% je vlasnik privrednog subjekta Zepter International Trading Holding AG, Švicarska Konfederacija, koji na teritoriji Bosne i Hercegovine ima (..)**% vlasništvo u dvije tvrtke kćerke - privredni subjekt Zepter International d.o.o. Kozarska Dubica i privredni subjekt Zepter International d.o.o. Sarajevo. Navedeni privredni subjekti u Bosni i Hercegovini djeluju u segmentu trgovine (direktnom prodajom) visokokvalitetne robe- posebno proizvodima za domaćinstvo.

Privredni subjekt UBA United Business - UBA Grupe ne djeluje na relevantnom tržištu trgovine odjeće i obuće na veliko i malo na teritoriji Bosne i Hercegovine.

¹ (..)** - podaci predstavljaju poslovnu tajnu

Također, privredni subjekt Home Art nije neposredni vlasnik i nema vlasničke udjele u privrednim subjektima u Bosni i Hercegovini.

Privredni subjekt Centrotexil

Privredni subjekt Centrotexil, je osnovan i djeluje u skladu sa propisima Republike Srbije, upisan je u registar Trgovačkog suda u Beogradu, pod matičnim brojem: 07453957, i kod Agencije za privredne registre Republike Srbije pod brojem: BD 4261/2005

Osnovna djelatnost privrednog subjekta Centrotexil je trgovina na veliko odjećom i obućom.

Privredni subjekt Centrotexil u Republici Srbiji, također je:

- (...)**% vlasnik privrednog subjektu CIS-Instituta d.o.o. (osnovna djelatnost - proizvodnja i kontrola kvaliteta tekstilnih i kožnih proizvoda), Vojislava Ilića 88, 11000 Beograd, Republika Srbija, upisan u registar Trgovačkog suda u Beogradu, pod matičnim brojem: 6768202;
- (...)**% vlasnik privrednog subjekta Centrotexil-Inženjering d.o.o., Kneza Mihailova 1., 11000 Beograd, Republika Srbija, upisan u registar Trgovačkog suda u Beogradu, pod matičnim brojem: 6468164.

Sudionik koncentracije u Bosni i Hercegovini-privredni subjekt CTB d.o.o. Bijeljina

Privredni subjekt Centrotexil 100,0% je vlasnik privrednog subjekta CTB d.o.o. Bijeljina, Miloša Crnjanskog bb, Bosna i Hercegovina (u daljnjem tekstu: CTB d.o.o. Bijeljina). Privredni subjekt CTB d.o.o. Bijeljina upisan je u registar Osnovnog suda u Bijeljini pod brojem: 1-4448.

Osnovna djelatnost privrednog subjekta CTB d.o.o. Bijeljina je unutrašnja i vanjska trgovina, posebno trgovina na veliko i malo odjećom i obućom.

Privredni subjekt CTB d.o.o. Bijeljina je raspolagao, u prethodnom razdoblju, sa tri maloprodajna objekta u gradovima - Prijedoru, Banja Luci i Bijeljini.

Pravni okvir ocjene koncentracije

Konkurencijsko vijeće prilikom provedbe postupka ocjene dopuštenosti predmetne koncentracije primjenilo je odredbe Zakona i Odluke o utvrđivanja relevantnog tržišta («Službeni glasnik BiH», broj 18/06) te odredbe Zakona o upravnom postupku («Službeni glasnik BiH», broj 29/02) u dijelu koji nije uređen odredbama Zakona.

Pravni osnov i oblik koncentracije

Pravni osnov predmetne koncentracije je Ugovor o prodaji društvenog kapitala dioničarskog društva za vanjsku i unutrašnju trgovinu Centrotexil, zaključen između Agencije za privatizaciju Republike Srbije i privrednog subjekta Home Art & Sales Service, dana 11. aprila 2007. godine u Beogradu, Republika Srbija (broj Ugovora: OV-II-594/2007).

Pravni oblik predmetne koncentracije je preuzimanje kontrole privrednog subjekta Home Art nad privrednim subjektom Centrotexil, u smislu člana 12. stav (2) tačka b) Zakona, odnosno sticanje većinskog vlasničkog udijela od 68,36% od ukupnog registrovanog kapitala, metodom javnog tendera. Privredni subjekt Home Art za navedeni vlasnički udio platiti će novčani iznos od (...)** KM.

Vlasnička struktura privrednog subjekta Centrotexstil, u osnovnom kapitalu, prije provođenja predmetne koncentracije (Tabela 1.):

Tabela 1.

Rb	Vlasnik	Vlasnički udio
1.	Društveni kapital	97,67%
2.	Mali dioničari	2,33%
	Ukupno	100,0%

Vlasnička struktura privrednog subjekta Centrotexstil, u osnovnom kapitalu, nakon provođenja predmetne koncentracije (Tabela 2.):

Tabela 2.

Rb	Vlasnik	Vlasnički udio
1.	Home Art	68,36%
2.	Društveni kapital	14,65%
3.	Mali dioničari	16,99%
	Ukupno	100,0%

Podnosilac Prijave, nakon provedene koncentracije, imat će ukupno 68,36% vlasničkog udjela u osnovnom kapitalu privrednog subjekta Centrotexstil te na taj način stiče kontrolu nad istim, u smislu člana 12. stav (1) tačka b) Zakona.

Provođenje predmetne koncentracije će dovesti do promjene kontrole nad privrednim subjektom CTB d.o.o. Bijeljina, koji je u vlasništvu sudionika koncentracije privrednog subjekta Centrotexstil, koji je registrovan na teritoriji Bosne i Hercegovine.

Analiza relevantnog tržišta

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda / usluga koje su predmet obavljanja djelatnosti na određenom geografskom tržištu.

Relevantno tržište proizvoda predmetne koncentracije je tržište trgovine na veliko i malo odjećom i obućom.

Relevantno tržište u geografskom smislu predmetne koncentracije je teritorij Bosne i Hercegovine.

Relevantno tržište predmetne koncentracije je trgovina na veliko i malo odjećom i obućom na teritoriji Bosne i Hercegovine.

Procjena koncentracije

Analizom podataka dostavljenih uz Prijavu, Konkurencijsko vijeće je utvrdilo da zajednički tržišni udjeli sudionika koncentracije na relevantnom tržištu trgovine odjeće i obuće na veliko i malo je ispod 1,0% ukupnog tržišnog udjela odnosno da je znatno ispod tržišnog udjela od 40,0%, u smislu člana 9. Zakona, koji pretpostavlja da privredni subjekt može imati dominantni položaj na relevantnom tržištu.

Također, Konkurencijsko vijeće je u analizama u obzir uzelo i djelatnosti privrednog subjekta Zepter International d.o.o. Kozarska Dubica i privrednog subjekta Zepter International d.o.o. Sarajevo, koji su u sastavu UBA United Business Activities Holding – UBA Grupe, i utvrdilo da isti ne djeluju na relevantnom tržištu privrednog subjekta CTB d.o.o. Bijeljina odnosno da nema

preklapanja u poslovnom djelovanju - prodaji proizvoda i /ili usluga na teritoriju Bosne i Hercegovine.

Ukupni prihodi sudionika predmetne koncentracije, na dan 31. decembra 2006. godine, iznose:

Tabela 3.

KM	UBA Grupe	Home Art	Centrotexil	CTB d.o.o. Bijeljina
Svijet	(..)**	(..)**	(..)**	
Bosna i Hercegovina	(..)**			-
Ukupan godišnji prihod sudionika koncentracije na svjetskom tržištu (Home Art + Centrotexil)		(..)**		

Iz navedenih podataka (Tabela 3.) Podnosilac Prijave je obavezan podnijeti Prijavu, u smislu člana 14. stav (1) tačka a) Zakona, jer su sudionici namjeravane koncentracije, u 2006. godini, prodajom roba i /ili usluga ostvarili ukupan godišnji prihod na svjetskom tržištu od (..)** KM (godini koja je prethodila koncentraciji), pri čemu najmanje jedan privredni subjekt sudionik koncentracije je registrovan na teritoriji Bosne i Hercegovine (djeluje na domaćem tržištu roba i /ili usluga).

Prema podacima iz Prijave privredni subjekt CTB Bijeljina, u 2005. godini, je imao ukupan prihod od (..)** KM, dok u 2006. godini nema prihoda budući da je otvoren postupak likvidacije u skladu sa zakonskom procedurom Republike Srpske (Osnovni sud u Bjeljini – broj: 080-0-L-06-000 015 dana 29.12.2006. godine) i isti je u toku.

Konkurencijsko vijeće na osnovu analize strukture relevantnog tržišta, tržišnih udioa sudionika koncentracije, u smislu člana 17. Zakona, ocijenilo je dopuštenom provođenje predmetne koncentracije te odlučilo kao u dispozitivu ovoga Rješenja.

Administrativna taksa

Na ovo Rješenje Podnosilac Prijave, u skladu sa članom 2. stav (1) tarifni broj 107. tačka d) 1) Odluke o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», broj 30/06) dužan je platiti administrativnu taksu u ukupnom iznosu od 2.500,00 KM, u korist Budžeta institucija Bosne i Hercegovine.

Pouka o pravnom lijeku

Protiv ovoga Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

Predsjednik

Sanja Božić